



# O MAUA ATOA O TE ATUA I TE ARORAA

Ua tupu te faaavariraa o te fare âmuiraa a Nafatari no te paroita Afareaitu i Moorea i te 6 no Tiuru 1987. E teie te parau tei aohia e te Peretiteni o te Tuhaa Toru o Antonio or.

Taioraa Pipiria: Ten. 49/21, Ita. 9/1-2, Mat. 4/1216, Firip. 3/14 vm.

Tenete 49/21: "O Nafatari ra, e àiri tuu-noa-hia ia..." Firipi 3/14 vm: "Te nenei tià atu nei au i te tapao..."

O Nafatari ra, e àiri tuu-noa-hia ia. E parau maitatai ta na e parau mai". E parau haamaitairaa tele na Iatopa, te metua tane o Nafatari e no to na mau taeaè, te tamarii Iteraera. O Nafatari, o te tamaiti ia tei noaa ia Iatopa no te vahine tavini o ta na ra vahine o Rahera, o Pira te ioa.

"Nafatari". Teie te auraa o teie ioa: Maua atoà o te Atua i te àrora. Na roto i to Rahera (te vahine a Iatopa) inoino ia Rea to na tuahine (te tahi vahine a Iatopa) i te mea, aita a e tamarii i noaa no Iatopa, maori ra ta Rea anaè, i horoà ai Rahera i to na tavini vahine ia Pira ia taotohia e Iatopa, e te tamarii e noaa mai, e riro ei tama na na (na Rahera). Ua rave o Rahera i teie peu, ia ore o ia ia faaoo e ia faaino-noa-hia, no te mea aita ta na e tamarii i fanau (i te reira tau, e mea hioraa ino roa no te hoë vahine tei ore i fanau, a bio ia Hana). Ia fanau mai o Pira ia Nafatari, e oaoa rahi to Rahera. I roto i to na manao, na te Atua i tauturu ia na, no te àrora i to na tuahine ia Rea tei fanau-tama, e tei riro mai te tahi àaraa ia na. I mairi ai o ia i taua ioa ra Nafatari i nià i taua aiu o ta to na tavini vahine i fanau: NAFATARI. E teie te

aura: "O maua atoà o te Atua i te àrora".

"E Nafatari Evaneria nei! O te auraa o teie nei ioa, o ta oe ia e tapeà; e aha ra te tumu i noaa, ai taua ioa ra. "O maua atoà o te Atua i te àrora". I roto i te ohipa rahi i haahia mai e oe, eere ia e, o oe anaè, o oe ra e te Atua atoà, i te "àrora" mai. A tapiri noa a i te pae o te Atua i te àrora ia upootià to na hinaaro i roto ia oe e i rapae atu ia oe.

"O Nafatari ra, e àiri tuu-noa-hia ia..." E ânimara iti peepee roa te àiri.. E mea au na na te àihere rii tupu âpi e te pape rii tahe ra. Eita e tano teie manu ia tuuhia i roto i te hoë âua no te mea, e mea au na na te ora tiama noa. Teie nei ânimara ta Iatopa i faaau i ta na tamaiti ia Nafatari. O to oe atoà nei ia huru e Nafatari Evaneria ? Ua taahia atu te reira i roto i te ohipa materia ta oe i rave mai. Tera ra, ei àiri peepee atoà oe i roto i te faaiteraa évaneria. Ia hiaai noa oe i te Parau a te Atua mai te àiri e hiaai noa i te àihere tupu âpi e i te pape rii tahe ra.

O Nafatari, ia au i te faaiteraa a te perofeta Itaia, e fernua faahaèhaahia ia, tei roto i te pouri. Te tohu ra ra o Itaia, e te vai ra te tau, e hitihia ai o Nafatari e te hoë maramarama rahi. Te feia e haere noa na te pouri, e maramarama te itea e ratou; e te feia i parahi noa i roto i te maru pohe ra, e hitihia ratou e te maramarama.

Ia au i te faaiteraa a te papai-èvaneria ra o Mataio, ua tupu taua tohu na Itaia ra, na roto ia Ietu Metia, "te maramarama no nià mai".

E to Nafatari, e tatou atoà nei, eiaha roa e faaatea è i te hitiraa o te maramarama ora. O to tatou ia aratai. Aratai i hea ? E aratai i nià i te tapao ta Pauro e parau ra i to Firipi e: "Te nenei atu nei au i nià te tapao. Taua tapao ra, e au ra e, o te "Hoira mai ia o te Fatu", te Mahana ôroà ia e tupu ai te "tomoraa" rahi hanahania no te Patireia o te Atua.

O Nafatari Evaneria, o te ioa ia o te pupu taata teretetiano e noho i roto i te faa no Haumi; i vai na mai te tau i mau ai te Faaroo Teretetiano i Aimého Nui nei.

O Nafatari Evaneria, o te ioa atoà ia no teie fare i oti nehenehe roa i te tatahia e i te faanehene-hehia, e ta tatou e faavari nei.

Te ite ra ia tatou e, e piti Nafatari: Nafatari taata, e Nafatari ôfai (fare). Te Nafatari taata, o te Nafatari mau ia; àreà te Nafatari fare, e tapao noa ia; e tapao e te vai ra o Nafatari taata. No Nafatari taata i Nafatari fare ai; eere ra no Nafatari fare i Nafatari taata ai. Teie te auraa o teie parau: E mea faufaa aè o Nafatari taata ia Nafatari fare. No tera mea te vai ra o Nafatari taata i patuhia ai o Nafatari fare. E mea papu maitai atoà e, no Nafatari taata i tatahia ai o Nafatari fare. Ia ore o Nafatari taata ia tomo i roto ia Nafatari fare no te ohipa i te èvaneria, e mea faufaa ore o Nafatari fare, e mea faufaa ore te rahiraa mirioni i haamauahia no te tatai ia na. A haamanao e,

ia riro o Nafatari fare, ei vahi e patuhia ai o Nafatari taata.

Nafatari: O maua atoà o te Atua i te àrora te auraa. I teie nei ua oti nehenehe ta oe fare, a rave faaohipa i te auraa o taua ioa no oe ra. A parau oe e Nafatari i teie mahana e: O maua atoà o te Atua ia àro, ia tupu te hinaaro o te Evaneria. O maua atoà o te Atua ia àro. Te taata teretetiano, o te hoë ia taata àro i roto i teie nei ao; àro i te parau e te ohipa tià ore, ia tupu te parau e te ohipa tià, te parau mau, te aroha e te hau o to na Fatu. I roto i taua àrora a te taata teretetiano ra, eere o na anaè, o raua atoà o to na Fatu; e o te àrora atoà ia a te Etaretia teretetiano. Teie atu ra ia te auraa: Nafatari, o te taata teretetiano tatai tahi ia, i roto i te auraa o teie ioa e: O maua atoà o te Atua ia àro".

E to te hui faaroo teretetiano nei, o tatou o Nafatari. Eiaha ia moè ia tatou e, e feia teretetiano tatou tatai tahi, e ohipa tumu ta tatou i te ao nei (chaque chrétien a une mission à accomplir dans ce monde). O tatou atoà e te Fatu i te àrora. I roto i taua àrora na tatou ra, a haamanao e, "te nenei tià atu nei tatou i te tapao". Te reira te fa. Eere ta tatou mau fare pure, ta tatou mau fare âmuiraa, ta tatou mau fare ui-âpi te fa no te ohipa a te Etaretia Teretetiano, e mau raveà anaè te reira; te fa mau, o to tatou ia titaura a faaineineraa i te taata no te hoira mai, to tatou Fatu, ia nehenehe atoà ia ratou ia riro ei mau "Nafatari" i teie nei ao. A rohi, faaitoito. Ia ora na.

Or. Antonio.

JEANNINA

35, rue Leboucher - Tél. 42.09.62  
Avenue du Régent Paraita - 43.98.29  
Raiatea : 66.36.95



Fauteuil

*Jean Gestas*

Bois merisier  
Dossier forme ogive

